

## **Iluarsiissut**

Akissuteqaat 2. maj 2023-meersoq taarserpaa  
(Allassimanerani aaqiisoqarpoq)

**Angajoqqaat erninermi sulinngiffeqarnerup naammassereersimanerani paarsisussarsisimanngitsunut pisortat qanoq ikiorsiisinaaneranut tunngasumik, siunnersuummik saqqummiussisussamik, suleqatigiissitaq nalunaarummik suliaqartussamik pileritsisoqarnissaanik Naalackersuisut peqquneqassasut Inatsisartunut aalajangiiffigisassatut siunnersuut. Nalunaarusiami siunnersuut aallaavigalugu pisortanut aningaasatigut suut kingunissaanersut ilaassapput. Suleqatigiissitaq innersuussutini kingusinnerpaamik 1. Januar 2024 saqqummiutereersimassavaat.**

(Demokraatit Inatsisartutgruppia)

### **Akissuteqaat**

(Meeqqanut, Inuusuttunut, Ilaqtariinnut Peqqissutsimullu Naalackersuisoq)

### **Siullermeerneqarnera**

Aalajangiiffigisassatut siunnersuummut matumunnga siunnersuuteqartumut qujanaq.

Ilaqtariittut nutaatut piffissami siullermi angajoqqaat meeqqallu tamatumunnga ikiorneqarnissaat Naalackersuisunut pingaaruteqarpoq. Taamaamat angajoqqaat erninermut atatillugu sulinngiffeqartarnerat pingaaruteqarpoq. Sulinngiffeqarneq qaangiukkaangat angajoqqaallu suliffimminnut utertussanngoraangamik meeqqat ulluunerani neqeroorummiitalernissaat aammattaaq pingaaruteqarpoq.

Inatsisartut inatsisaanni § 5 malillugu kommunalbestyrelsip pisussaaffigaa qularnaassallugu meeqqanut suli atualingitsunut tamanut pisariaqartunik amerlassusilinnik ulluunerani neqerooruteqarnissaq.

Sulinngiffeqareernerup kingorna meeqqat nukangasut ulluunerani neqeroorummiitalernissaannut inissamik pissarsinngikkaangata tamanna assorsuaq ilungersunartarpoq. Meerartik paariniarlugu suliffimminniit akissarsiaqaratik sulinngittarnissartik, suliffimminniit soraartariaqarnissartik imaluunniit meeqqaminnut paarsinermik aaqqissuussamik allaanertut ittumik nalorninartortalimmik ujarlertariaqarnertik pissutaallutik angajoqqaanut ernumalersitsisarpoq.

Meeqqagut illersugassaraagut aamma meeqqat paarsisussaqaarnissaannut periarfissat qulakkeerniarlugit oqartussat akisussaaffimmik tigusisariaqarput. Kommunit ilaanni naammattumik amerlassusilinnik meeqqanut ulluunerani neqerooruteqarpoq, kommuninili allani meeqqanut ulluunerani neqeroorutit amigarsinnaasarlutik.

Meeqqanut ulluunerani neqeroorutiniq qularnaarinissaq kommunit akisussaaffigaa. Akisussaaffimmik taassuminnga kivitsinissaq pillugu Naalackersuisut kommuninik oqaloqateqarput.

Naalackersuisut taamatut oqaaseqarlutik siunnersuut itigartinneqassasoq inassutigaat.